

Offizielle scout

1 / 2023

schnier, 8. annada



Bainvgnüts...

Romeo à Porta, Rodrigo Araújo Cardoso, Jenny Benderer, Afonso Bezerra Gonçalves, Carla Birrer, Mic Brunies, Cesonia Lazara Cedar, Larissa Caprez, Balam Cervantes Strub, Laura De Stefano, Lino Demonti, Leo Dorta, Malin Leonie Etter, Nic Elia Etter, Oliver Franziscus, Johann Giacumin Frieser, Maurin Grass, Sarina Häfner, Luljan Hajraj, Mara Hauser, Benjamin Robert Heidenreich, Melina Olivia Janett, Ninetta Müller, Mia Isabella Nagy, Levin Pfranger, Leo Pinto Ribeiro, Nelio Rothermund, Gabriel Rotiroti, Arina Scandella, Livio Schorta, Jonas Schütz, Nadia Thairi, Leandro Valentin, Andrina Leandra Vital, Nadine Vonlanthen



Lisa pro'ls capricorns

Sün üna fich bella alp viva ün chavra insemel cun bleras otras chavras.

Dapertuot intuorn esa prada e grippa. Nossa chavra cun nom Lisa es pro la saiv ed observa ils capricorns.

“Quant gugent füss eir eu ün capricorn”, as disch Lisa.

Sün quai rian tschellas chavras: “Che, tü ün capricorn? Na, quai nu va!”, disch ün'otra chavra. Lisa disch però plain superbgia: “Schi, quai va!” “Bun, schi fain üna scumissa”, disch la chavra la plü veglia, “tü stoust star desch dis pro'ls capricorns!” Nossa Lisa respuonda: “Perinclet, schi fain quai.”

Lisa as metta in viadi e tira ün sigl: “Ohh”, sbraja Lisa e la mür Andri respuonda tuot quieta: “Chau.”

Lisa guarda ingiò e respuonda stutta: “Chau”.

Andri dumonda a Lisa: “Che fast quia? Perche nun est giò'n alp pro tschellas chavras?”

“Ma sast - eu vuless accumplir meis plü grond giavüsch”, disch Lisa, “tschellas chavras nu crajan ch'eu riva d'accumplir meis giavüsch e lura vaina fat üna scumissa.” Andri dumonda sün quai: “Vessast plaschair sch'eu füss teis cumpogn da viadi?”

“Hai”, respuonda Lisa, “fich cuntainta!” Sül viadi disch Lisa: “Mo, eu n'ha ün giavüsch”. Andri dumonda:

“Che giavüsch hast lura? Forsa at possa güdar?” “Eu less gnir ün capricorn. Sast tü co ch'eu pudess gnir ün capricorn?”, dumonda Lisa. “Sast, eu n'ha ün ami e quel es ün capricorn, forsa po quel güdar a tai”, disch Andri. “O quai füss üna bun'idea! Quant lönch as douvra per ir sü pro'ls capricorns?”, dumonda Lisa. “Eu stoss, per guadagnar la scumissa, star casü desch dis”. “Lura stuvaina far prescha ed ir subit”, disch la mür.

Arrivà sulla muntogna disch Andri a Lisa : “Uossa stoust ir suletta fin pro'l muot e lura es là üna scossa da capricorns.” Lisa es natüralmaing fich agitada cur ch'ella vezza ils capricorns. Ün da quels vain nan e tilla dumonda: “Che fast tü quia?” Lisa respuonda: “Eu n'ha fat üna scumissa ch'eu stöglia star 10 dis sü pro vo e verer ed imprender co cha vo vivaivat.” Il capricorn respuonda plain plaschair: “Schi bain, resta pro no.”

Ils dis e las nots passan e Lisa contaimpla ed imprenda da las bes-chas imposantas. Ella es uschè fascinada dals capricorns ch'ella invlida il temp e nu bada perquai chi sun fingià passadas traiss eivnas. Ella piglia lura cumgià dals capricorns e disch ch'ella stöglia ir darcheu aval avant chi gnia l'inviern.

Ils capricorns sun surprais da sia prestaziun, dischan chau e dafatta ch'ella das-cha darcheu gnir pro els. Lisa as metta in viadi giò da la costa vers l'alp. Andri vaiva cumanzà as far gronds pissers perquai chi paraiva cha bainbod gnia la naiv, ma per furtüna vezza'l ün di a Lisa a gnir giò da la costa, cuorra vers ella e disch a Lisa: “Per furtüna est gnüda ingiò. Eu n'ha cret ch'eu nu't vezza mai plü!” Lisa es stutta e disch : „I nu d'eira naiv sulla muntogna!” Lisa ed Andri chaminan insemel giò vers l'alp. In viadi da retuorn inscuntran els üna vuolp. Quella manaja: “Vo stuvais ir plü svelt perquai chi vain bainbod la naiv.”

Lisa vezza a tuot tschellas chavras da l'alp e siglia cun dalet vi pro ellas. La veglia guarda tuot stutta e manaja cun bocc'averta: “Uau, eu n'ha pensà cha tü tuornast fingià davo pacs dis. Gratulesch!” Eir il rest da la scossa es stut da nossa Lisa.

Üna chavra voul savair da nossa Lisa co chi'd es da viver cun capricorns. Ella cumainza a quintar ün'aventüra davo tschella. Las chavras taidlan cun uraglias agüzzas tuot l'utuon fin al cumanzamaint da l'Advent. Las chavras sun tuornadas in stalla in cumün e Lisa vaiva amo adüna da raquintar üna pruna istorgias. Gnanc'üna chavra nu tilla ha plü ris oura perquai ch'ella vaiva gnü ün desideri particular. Na, tuottas vulaivan esser sco ella, nossa chavrina la plü curaschusa da tuottas.

Lisa es cuntainta ch'ella s'ha ris-chada da cumanzar quist'aventüra ed es eir surleivgiada cha la mür tilla ha güdà ed as disch suot vusch: “Quist'aventüra nun invlida mai plü!”



NOVISCO



Ün cumün plain naiv

» » » » » » » » »

L'istorgia as tratta d'ün cumün plain naiv immez l'Engiadina. Quist cumün es situà sün bod 2000 meters sur mar ed ha var 500 abitantas ed abitants.


Ün da quels es Otto. Otto posseda üna stalla fich gronda cun vachas, chavras, gallinas ed ün chan. Il plü jent ha'l a seis giat.

Otto es 70 ons vegl però amo fich bain in chomma. El nu va jent our il liber, be cur ch'el sto ir a pavlar sias bes-chas. Cur chi naiva, sta'l plü jent in chasa a verer televisiun. Pel solit guarda el illa televisiun las novitats da l'Engiadina. Quista saira es nos pover Otto però schoccà. In üna contribuziun illa televisiun vegna nempe manzunà cha'l's lufs sajan tuornats in Engiadina Bassa.

El va in cumün e quinta la novità dals lufs a tuot ils paurs ch'el inscuntra. Id es bainbod saira. Otto sto ir a pavlar las bes-chas. Las bes-chas han gust dal pavel. Eir Otto svess va a mangiar tschaina. La duonna ha fat üna schoppa da giuotta. Otto tilla mangia e va lura a durmir. El dorma fich bain, ma na propa lönch. El sto star sü fingià a las 05:00h a bunura per ir pro las bes-chas in stalla.

Tant dad Otto. Guardaina üna jada che cha Annamaria fa. Annamaria es eir üna da quistas 500 abitantas dal cumünin illas muntognas. Annamaria va fich jent culs skis. Ma na dûrant il temp da Nadal. Là esa bler massa blera glieud da la Bassa chi nu sa ir culs skis. Ün oter passatemp dad Annamaria es far pastinas da Nadal. Ella tillas venda minch'on sül marchà da Nadal. Annamaria es fingià üna duonnetta ün pa plü veglia e dafatta nona da duos abiadis. Seis abiadis han nom Nina ed Ena. Nina va in 6avla classa e sta eir in quist bel cumün. Ella zambriescha fich jent. D'inviern va ella, sco eir sia nona, fich jent cull'assa. Il plü jent va'la aint il Snowpark. Ella as partecipescha pro differentas concurrenzas e tillas guadogna eir suuent.

Ena es il frar plü giuven chi frequanta la 4. classa. El va fich jent culs skis da passlung. El es fich cuntaint cha in cumün daja üna pista per ir culs skis da passlung. Duri es seis meglider ami. Eir el va in 4.classa e fa jent passlung. In tuot la scoula da quist cumün esa be var 35 scolars. Tuot ils scolars han grond plaschair dal temp da Nadal. A scoula daja dafatta ün chalender d'Advent. I dess da quintar amo uschè blera roba interessanta dal cumün e seis abitants...



istorgia: 5.e 6avla classa
disegns: scoulin

La laver sociala da scoula illas scoulas dal cumün da Scoul

Daspö avuost 2022 exista a Scoul la laver sociala da scoula. Mia incumberza profesionala es da fabrichar sü quella per tuot las numerusas sportas per la promozion dals uffants e giuvenils in üna scoula. I'l rom da la baza legala agischa ella plü o main independentamaing. Ella s'orientescha al bsögn dals uffants e giuvenils per üna protecziun adattada a l'etä e per ün svilup persunal. La laver sociala da scoula as mouva sül glim tanter temp liber, famiglia e scoula. Sia tenuta invers ils claints es adüna neutrala, i'l sen dals drets da l'uman.

Cun quist artichel lessa preschantar meis manster sco laverant social da scoula.

La laver sociala da scoula es üna nouva gruppera professiunala i'l sectur da la laver sociala. Ella es colliada strettamaing cullas valurs dals drets da l'uffant e vain confruntada cullas consequenzas da la globalisaziun economica chi chaschuna sün tuot il muond üna gronda varietä culturala. Quist fenomen s'inaccordschan las scoulas fich ferm e la sfida da chattar nouvas vias per la promozion dals uffants e giuvenils es gronda. Uschè reflesta la laver sociala da scoula eir la müdada da valurs illa societä.

Il manster da la laver sociala pretenda ün stüdi da scoul'ota terminä, conqualabel cun quel d'üna persuna d'instrucziun pel s-chalin ot. La gronda part da la laver dals laverants socials nun es visibla. Uschè nu's schmürvaglia da dudir dumondas sco: «Che fa ün laverant social da scoula? Perche as douvra quel hozindi, da plü bod gaiava quai eir

sainza?»

La laver sociala da scoula es üna da las numerusas sportas per la promozion dals uffants e giuvenils in üna scoula. I'l rom da la baza legala agischa ella plü o main independentamaing. Ella s'orientescha al bsögn dals uffants e giuvenils per üna protecziun adattada a l'etä e per ün svilup persunal. La laver sociala da scoula as mouva sül glim tanter temp liber, famiglia e scoula. Sia tenuta invers ils claints es adüna neutrala, i'l sen dals drets da l'uman.

Il sustegn da la laver sociala da scoula ha la mera da promouver l'independenza dals uffants e giuvenils e da cusglier a lur contuorn in dumondas pedagogicas ed educativas. Ün punct central da la laver sociala da scoula es la libra voluntä da seis claints e la fuormaziun d'üna relaziun sün basa da stima e d'incletta per la situaziun. La laver sociala da scoula sto resguardar la protecziun persunal e l'obligaziun da discrezio.

Cur cha la vita dals uffants e giuvenils es periclitada acutamaing contactescha la laver sociala da scoula activmaing als organs responsabels ed a las personas responsablas per l'educaziun. Quai fa ella eir sainza il consentimaint dals uffants e giuvenils.

La laver sociala da scoula laveria in princip insembe cun differents posts specialisats i'l sectur so-cial, psicologic, medicinal e pedagogic.

In cas da bsögn collavurescha ella eir cun instanzas sco l'autorità per la protecziun d'uffants e da creschüts, la polizia e la pro-



cura per giuvenils. Il bainstar dals uffants e giuvenils ha adüna priorität.

Cull'introducziun da la laver sociala da scoula ha il cumün da Scoul fat il prüm pass d'ün process per realisar üna sporta chi douvra temp per as stabilir. Scha genituors han dumondas o giavüschs pon els sainz'oter s'annunzchar pro mai. Pel mumaint be in frances o tudais-ch. Üna da mias prümas incumberzas, sper il fabrichar sü la laver sociala da scoula, es d'imprender il rumantsch vallader.

Olivier Fasching, laverant social da scoula, +41 78 252 93 35, olivier.fasching@miascoula.ch

La laver sociala da scoula cuntegna las seguentas spüertas:

- cussagliaziun individuala pro conflicts e cristas da scolaras e scolars
- cussagliaziun da genituors pro dumondas d'educaziun o pro conflicts culla scoula
- intermediaziun tanter posts da cussagliaziun per genituors o lur uffants
- cussagliaziun per sclerir conflicts tanter gruppas da scolaras e scolars
- cussagliaziun per personas d'instrucziun e mainascoulas pro sfidas cun uffants e giuvenils o lur genituors
- sustegn per schoglier conflicts in classa
- spüertas da prevenziun per classas per temas sco l'adöver da medias socialas, cumpetenza sociala, mezs da dependenza o sandà psichica
- sustegn per fabrichar sü ün cussagl da classa o ün parlament da scola-ras e scolars, sco eir üna cultura da stima vicendaiva in chasa da scoula
- sustegn per fuormar la relaziun tanter genituors e scoula e fabrichar sü ün cussagl da genituors
- mantgnair ils contacts da las raits professiunala in scoula e dadour la scoula



Chau insembe, eu sun Meret Wüest, assistenta da giuvenils dal cumün da Scoul daspö i'l 1. avuost 2022. Eu sun impiegada dal cumün cun ün pensum dad 80 %. Aint in meis büro in chasa cumünala suna ragiundschiebla adüna da mardi fin venderdi. Là poust tü per exaimpel – insembe cun oters giuvenils – organisar progets, crear il placat dal mais



obain far dumondas davart tuot ils temas importants pella giuventüna. Il lö d'inscunter es avert adüna marcurdi e venderdi pellas scolaras e's scolars dal s-chalin ot da tuot ils 6 cumüns. Eu m'allegr mincha jada da verer nouvas fatschas! Ed eu spet be buonder da pudair realisar progets fantastics pel temp liber insembe cun vo. Tuot las infuormaziuns importantas chattast sün noss placats dal mais chi stan a disposiziun in blers lös obain sün Instagram suot «lavurcungiuvenils».

**Meret Wüest, assistenta da giuvenils dal cumün da Scoul
+41 78 254 00 83
m.wueest@scoul.net**

Infoformaziuns



Plan da scoula 2023

Scoula	Vacanzas
09.01.2023 - 03.03.2023	*04.03.2023 - 12.03.2023
13.03.2023 - 04.05.2023	05.05.2023 - 21.05.2023
22.05.2023 - 30.06.2023	01.07.2023 - 13.08.2023
14.08.2023 - 06.10.2023	07.10.2023 - 22.10.2023
23.10.2023 - 22.12.2023	23.12.2023 - 07.01.2024

* Vacanzas da Chalandamarz han lö a Plan dals 5 - 12 marz 2023

Üsanzas

Ftan	Scoul
4 favrer 2023	Schüschaiver
3 marz 2023	Talocs
4 marz 2023	Chalandamarz
22 dec. 2023	Nadal da scoula

Sent	Tarasp
1. marz 2023	Chalandamarz
amo incuntschaint	Nadal da scoula

Ardez	Guarda
1. marz 2023	Chalandamarz
21. dec. 2023	Nadal da scoula

Dis da festa

07 - 10 avrigli 2023	Pasqua
18 mai 2023	Ascensiun + Punt d'Ascensiun (illas vacanzas da mai)
29 mai 2023	Tschinquaissa
1. nov. 2023	Festa da tuot ils Sonchs (be la scoula da Tarasp)

Quist chalender rimplazza tuot ils chalenders chi sun gnüts publichats plü bod!

TARASPI

novitats da la scoula Tarasp

Las scolaras e scolars da la 3. – 6avla han scrit istorgias cun differents geners, ma cul istess titel.

Üna not sül chaste da Tarasp – un' istorgia d'amur

Üna bella not l'on 1991 han Julietta e Jeff, ün giuven périn fitch inamurà, reservà üna guida tras il chaste da Tarasp. A las 20:03 staivan els davant il portal ed han spettà a la guida. Ün pa plü tard è'la gnüda ed els han cumanzà. Els sun chaminats tras stanzas bain decoradas cun pots da fluors vegls cun aint bellischmas fluorinas, blers disegns e fotografias. Dandettamaing sun els gnüts in una stanza s-chüra e spüssulenta. La guida ha dit, ch'ella giaja cuort in tualetta. Julietta e Jeff han surgni la pel giallina. Cun verer intuorn hana vis üna porta nairischma. Id han surgni temma e s'han tut pel man. Buonder nu tils mancaiva ed i sun its planet pro la porta naira. Jeff ha schmachà la nadiglia fraida e drivi la porta. Plan planet suna entrats. La porta s'ha serrada cun ün sfrach. I s'han vouts vers la porta ed han badà ch'ella nu d'eira plü là. Tras quai hana surgni amo daplü temma e s'han branclats. Julietta ha tut oura la glüm da s-charsella ch'ella vaiva apostea tutta cun sai. Cur ch'ella tillia vaiva impizzada, hana vis üna fanestrina i'l chantun. Svelt suna its via ed han guardà oura. Coura hana vis l'üert dal chaste. Julietta e Jeff s'han dat darcheu il man e guardà amo üna jada intuorn. Id han badà ch'els sun in una stanza. Id han pers la spranza ed han pensà chi nu güda nöglia da tscherchar üna via per ir oura. Cun as metter giò es gnüda la stanglantüm. Els han tadà amo ün tempet a scruoschir la laina e lura suna indurmanzats.

Il sulai es planet alvà ed ün raz es gnü tras la fanestrina sulla fatscha da Jeff. Be planetin s'ha'l sdrooglià ed ha badà la chalur da Julietta. A Julietta ha'l laschà dormir amo ün pa. Cur cha tuots duos d'eiran sdruagliats, hana guardà our da fanestra. Id han vis il tramunt dal sulai cun tuot sia bellezza. Id han guardà intuorn illa stanzina chi d'eira

Els sun its tras la porta i'l piertan chi d'eira

Plain algrezcha s'hana branclats e bütschats.

darcheu in sia bellezza veglia.

Cun blera spranza suna cuorruts

pro la sortida. Duos ons davo

quist evenimaint hana maridà

aint il chaste e vivan amo

adüna cuntasins insemel.

ladina e leonor



–üna not sül chaste da Tarasp– –ün'aventüra–

Ün di es Claudio i a verer üna preschantaizun dal chaste da Tarasp. Chaminond sü da la via da Sparsels stübgiaiva'l che ch'el fess sco prüm o che ch'el guardess. Rivà sül chaste ha'l vis üna schurma d'gleied. El vaiva clostrofobia e chaminaiva davo la glieud, ma in ün dendet ha'l surgni panica ed es cuorrü in tualetta. Lä ha'l tschüf mal il cheu da tuot quist ed es crodà in svanimaint. Bun ch'el vaiva ün'ura cun sai. El es sdrooglià aint il s-chür e vaiva ün pa temma, ma be ün pa. El s'ha decis dad ir our da la tualetta ed es chaminà tras il piertan. Las chandailas ardaivan ed el ha let sün ün fögl, cha Not Vital saja i in vacanzas in Italia. El ha inclet ch'el stopcha survivor traïs eivnas aint il chaste. Darcheu vaiva'l panica. El s'ha calmà ed es i tscherchar da mangiar ed aqua per almain duos eivnas ed es i in ün lö protet. Rivà illa cuschina ha'l vis rests da mangiar da Not Vital, ils quals el ha tut cun sai. Pro ün portun è'l rivà e til ha drivi e vaiva la bocca averta. „Char Segner, quant grond es quist!“ El ha decis dad ir in tschercha da roba per durmir. Chattà ha'l ün mataratsch ed ün plümatsch cun üna cuverta per durmir. El ha dudi ad inchün. El vaiva enorm temma, perquai ch'ingün nu pudaiva savair ch'el es aint il chaste sainza Not Vital. El ha vis cha quai d'eira la nettiadra - ella discurriva cun Not Vital dad ün termin pel cuafför in Italia. El s'ha vout ed ha vis a blera gieud. Igniva adüna plü s-chür e plü s-chür.

„Ma uej, sta sü, ma subit ed oura cun tai!“ El es sdrooglià tuot schoccà e tuot quist es capitâ i'l temp da seis ir in svanimaint. . **HAPPY END.**

Angela e Diego



Tschinch sens in tschinch frasas

La 5avla e 6avla classa d'Ardez e Guarda ha gnü l'incumenza da descriver ün oget obain ün lö in tschinch frasas cun tuot ils sens. Ils uffants da 1. e 2. classa han disegnà ils purtrets chi s'affan cullas ingiavineras. Est bun da cumbinar ils texts cul güst purtret?

Quel oget as vezza davent d'Ardez, ma eir davent da Ramosch.


I's doda a schuscharur il vent tras la müraglia.

Aint in quel oget gusta süt e d'aventüras passantadas.

Id es uschè grond, chi nu's riva da palpar tuot in üna jada.

I savura da temps plü vegls.

Janina, Sina, Severin



Carla

Ingün nu sa dir dal sgür co chi guarda'oura là, ma i para d'esser sgrischaivel.

Schi's sarà là, ardarà la pel sco il fö.

I's dudirà a sbragir glieud noscha.

In quel lö gustaraja uschè picant sco il chili sulla lengua.

I savurarà brüschè e da füm.

Aaron, Selina, Talin



Noemi, Sarina

Quel oget es fich imposant.


Schi s'es in vicinanza da quel, as doda co cha'l utschels chantan bellas melodias.

L'odur da quel oget es fich magica e speciala.

Il gust po esser fich dutschin.

Schi's va be planin suravia cul man, poja tachar ed esser gruogl.

Damian, Melia, Nicolin



Afonso, Balam



Larissa, Livio

Quist oget po gnir fat our da differents materials, sco lain o crap.

Schi s'es dasper quel oget murmurà.

I savura ün pa müffin.

Tuot tenor ingio gusta different, per exaimpel da fier.

D'üna vart esa bletsch e da tschella vart süt.

Kim, Laurin, Leonor



Superforzas!

Anna abita cun sia mamma in üna pitschna chasa aint il god. Seis bap es fingià mort ed ella nun ha ingüns fradgliuns. Per ir a scoula sto ella passar tras tuot il god. „Anna, poust tü svelt ir a comprar pan?“, dumonda la mamma. „Hai, fetscha“, disch Anna. La mamma dà ils raps ad Anna ed ella va our da chasa. Ella passa tras il god e riva in butia. Ella cumpra il pan e va a chasa. Chaminond vers chasa tras il god, vezza ella ad ün homin. Ella til ignorescha simplamaing. Ma cun passar dasper l'homin via, disch quel: „Chau, vessast tü gugent da comprar quista butiglia?“ Ella nu cugnuoscha a quel homin e nu sa che chi'd es aint illa butiglia, ma i sun restats ün pér raps ed ella decida da tilla comprar.

Anna tuorna a chasa, va aint in chadafö e lascha il pan sün maisa. Ella va in sia stanza e stübgia: „Dess eu uossa baiver quist? Eu nu crai chi saja üna bun'idea, ma eu baiv listess. Mmmh...id es bun!“ I nun es capitå nöglia. „Eu crai chi saja üna bavronda tuot normala“, as disch ella e va in let a durmir.

Il di davo va ella a scoula. Sia stanza da scoula es pitschna ed els douvrano hoz bler lö per far üna lavur da NUS. E perquai ston els stumplar inavo ils bancs. I sun bancs da duos persunas e quels paisan magara. Ma Anna riva da stumplar ün banc be suletta.

Tuots tilla guardan da quai curius.



Cun tuornar a chasa es ün bös-ch immez la via. Ella pensa: „Eu prouv da stumplar davent quist bös-ch, sch'üna persuna voul passar quia cul auto ha ella ün pér problems.“ Anna pensa, ch'ella nu saja buna, ma cun pacà fadia es il bös-ch fingià da tschella vart. „Ok, quist d'eira curius, ma forsa nu pasaiva'l uschè bler“, as disch ella e va a chasa.



A chasa va ella in sia stanza e cumainza a far lezchas. „Anna, vè svelt nan“, cloma sia mamma. Anna va pro sia mamma e dumonda: „Che esa?“ „Eu douvr teis agüd. Id es rivà ün paket, id es aint üna nouva maisa. Am poust güdar a tilla portar aint?“, rouva la mamma. „Hai, cler!“, responda Anna. Anna doza aint il paket be suletta. „Co rivast tü da tour aint il paket sainza meis agüd? Gnanc'eu nu riv quai!“, disch la mamma.



Anna tuorna in sia stanza e decida da verer plü precis che chi'd es scrit sulla butiglia. „SUPERFORZAS“ esa scrit sulla butiglia. „Ok, ma quant lönch düra quai?“, stübgia Anna e legia inavant.

„Superforzas dûrant ün mais!“, esa eir amo scrit. „Che? Dûrant ün mais?!“, disch Anna. Uossa ha ella ün mais forza e po güdar a chi ch'ella voul.



Ün'eivna plü tard cur cha Anna va a scoula, prouvan tschels scolars da serrar oura a la magistra. Els mettan bancs e sopchas davant la porta. La magistra es coura e sbraja: „Laschaj gnir aint a mai, uschigliö duna ün chasti a tuot la classa!“ Anna nu voul avair ün chasti, ma ingün nu voul tuor davent ils bancs e las sopchas davant la porta. Perquai piglia Anna be suletta davent ils bancs e las sopchas. Tuot tschels stan là be cun bocc'averta, ma cuntaints da nun avair surgni ün chasti.



Davo ün mais nun ha Anna plü forzas, ma ella ha pudü güdar a blera glieud.

Forsa chatta ella darcheu a quel hom e chi sa - forsa dà el darcheu üna butiglia chi dà forza o eir alch oter.



text: Joana

disegns scoulina: Kimi, Sarah, Nico, Sophia, Lin, Seraina, Francesco, Afonso